

Jambatan: Dr. Mahathir kemuka alasan 16 perkara

UM-28/4/2006

KUALA LUMPUR 27 April - Perbalahan Tun Dr. Mahathir Mohamad dengan kerajaan berkaitan keputusannya membatalkan pembinaan jambatan menggantikan Tambak Johor tercetus kembali hari ini dengan bekas perdana menteri itu berkata beliau langsung tidak dapat menerima alasan keputusan itu.

Dr. Mahathir berkata semasa beliau menjadi perdana menteri, rakan sejawatan Singapura ketika itu Goh Chok Tong telah menerima cadangannya membina jambatan itu di sebelah Malaysia tanpa syarat.

Tetapi oleh kerana Singapura tidak sedia membuat keputusan untuk membina jambatan di sebelahnya menggantikan Tambak Johor di sebelahnya, beliau memberitahu Singapura bahawa Malaysia berhasrat membina jambatan di sebelahnya dan bercantum di bahagian Tambak Johor yang juga terletak di sebelah Malaysia.

"Tambak di sebelah Singapura tidak akan disentuh. Sambungan akan tetap antara bahagian Tambak Johor yang dikekalkan. Tidak ada syarat dikenakan bagi persetujuan ini, tidak ada pasir atau ruang udara disebut," kata Dr. Mahathir dalam satu kenyataan.

Beliau menjawab kenyataan Duta Kelana

Kementerian Luar, Tan Sri Ahmad Fuzi Abdul Razak Isnin lepas bahawa keputusan kerajaan membatalkan projek itu merupakan pilihan terbaik memandangkan sentimen rakyat yang kuat menentang tuntutan Singapura agar Malaysia menjual pasir kepada republik itu dan membenarkan penggunaan ruang udara Malaysia untuk pesawat tenteranya.

Ahmad Fuzi berkata keputusan itu dapat mengelakkan kedua-dua pihak dari bergelut dalam kancah politik dan perbalahan undang-undang yang tak berkesudahan, dan menyatakan, berikutan keputusan itu, Malaysia tidak perlu mempertimbang membatalkan pengharaman eksport pasir dan membenarkan Singapura menggunakan secara terhad ruang udaranya untuk penyelidikan dan kerja-kerja penyelamat.

"Penjelasan Tan Sri Fuzi yang berbelit mengenai jambatan itu hanya meyakinkan bahawa keutamaan dan hasrat kerajaan ialah menjual pasir kepada Singapura. Jika ia tidak dibenarkan berbuat demikian maka Malaysia tidak akan dapat jambatan," kata Dr. Mahathir dalam kenyataan 16 perkara.

Dr. Mahathir berkata, adalah jelas dan

direkod secara bertulis yang beliau bercadang membina sebuah jambatan di sebelah Malaysia dan Perdana Menteri Singapura menyetujuinya."

"Jadi keputusan unilateral menjadi bilateral bila Singapura menyetujui dan menerimanya. Sebarang perubahan mestilah juga dipersetujui oleh kedua-dua pihak," katanya.

Oleh itu, kata Dr. Mahathir bagi Singapura menambah syarat lebih dua tahun kemudian bagi pembekalan 50 juta meter padu pasir untuk tempoh 20 tahun dan membenarkan Tentera Udara Singapura terbang di ruang udara Malaysia dianggap perubahan unilateral.

"Malaysia boleh menolak syarat baru itu dan memaksa Singapura mematuhi persetujuan antara dua Perdana Menteri," kata beliau.

Dr. Mahathir mengulangi bahawa jambatan Malaysia akan bercantum di Tambak Johor sebelah Malaysia dan satu-satunya cara Singapura boleh menyekat lalu lintas dari Tambak sebelah Malaysia ke sebelah Singapura ialah meletak sekatan di sempadan Tambak Johor.

"Ini pastinya merupakan tindakan tidak mesra. Ia merupakan tindakan Singapura memotong hidungnya hingga merosakkan

mukanya.

"Kesan kepada bisnes Singapura sekurang-kurangnya seburuk yang mungkin dihadapi Malaysia. Tetapi, pada realitinya, Singapura memerlukan Malaysia lebih daripada Malaysia memerlukan Singapura. Kita punya pelabuhan dan lapangan terbang menggantikan pelabuhan, lapangan terbang dan perkhidmatan lain Singapura," katanya.

Dr. Mahathir berkata tidak perlu dibimbangi hak Malaysia dalam perairan wilayahnya sendiri tetapi kerajaan tidak berusaha sebaiknya bagi menolak syarat dikenakan Singapura.

"Ia menyerah kononnya kerana pihak berkuasa undang-undang Malaysia percaya Singapura betul. Adalah menarik bila membaca alasan Peguam Negara menyimpulkan bahawa Singapura mempunyai apa yang disifatkan sebagai hak wilayah ekstra dan Malaysia tidak mempunyai hak kedaulatan dalam perairan wilayahnya sendiri," kata beliau.

Dr. Mahathir mendakwa pada keseluruhannya, adalah jelas kerajaan Malaysia lebih berminat menjual pasir kepada Singapura daripada membina jambatan.

"Minat menjual pasir ini agak anih kerana

Malaysia tidak memerlukan hasil dari jualan pasir. Walaupun saya berbelanja secara yang dikatakan begitu mewah semasa menjadi perdana menteri, Malaysia tidaklah begitu bankrap hingga ia perlu menjual pasir," kata beliau.

"Perihal ada pemimpin Malaysia tidak terkejut dengan idea mengorek satu bilion meter padu pasir dari dasar laut Malaysia bagi tempoh 20 tahun, dengan itu memusnahkan kawasan ikan membiak di perairan Malaysia, menyebabkan nelayan Malaysia hilang mata pencarian, merosakkan ekologi marin; adalah sesuatu yang sukar dibayangkan.

"Perihal ada pemimpin Malaysia sanggup melayani idea ini, untuk merosakkan laut Malaysia bagi memuaskan Singapura tidak menunjukkan dengan baik cintanya terhadap negaranya," kata beliau.

Sementara itu, sumber kerajaan berkata: "Kami terkejut dengan pandangan yang dilahirkan Dr. Mahathir.

"Kerajaan menghentikan rundingan mengenai jambatan kerana menjual pasir ke Singapura tidak dapat diterima oleh rakyat Malaysia," kata sumber itu.